

Namminersorlutik Oqartussat Umiarsualivimmiinnermut aamma umiarsuarni takornarianik angallassisuni ilaasut akileraarutaat pillugit Inatsisartut inatsisaat pillugu nalunaarutaat

Manna Umiarsualivimmiinnermut akileraarutit pillugit Inatsisartut inatsisaat nr. 20, 30. oktober 1992-imeersoq, Inatsisartut inatsisaatigut nr. 4, 13. maj 1993-imeersukkut, Inatsisartut inatsisaatigut nr. 14, 28. oktober 1993-imeersukkut, Inatsisartut inatsisaatigut nr. 11, 13. juni 1994-imeersukkut, Inatsisartut inatsisaatigut nr. 17-imut, 3. november 1994-imeersukkut, Inatsisartut inatsisaatigut nr. 1, 20. maj 1998-imeersukkut, Inatsisartut inatsisaatigut nr. 2, 21. maj 2002-meersukkut, Inatsisartut inatsisaatigut nr. 3, 27. marts 2006-imeersukkut, Inatsisartut inatsisaatigut nr. 14, 2. november 2006-imeersukkut, Inatsisartut inatsisaatigut nr. 8, 5. december 2008-meersukkut, Inatsisartut inatsisaatigut nr. 14, 3. juni 2015-imeersukkut kiisalu Inatsisartut inatsisaatigut nr. 61, 20 november 2023-meersukkut allannguutilik nalunaarutigineqarpoq.

§ 1. Umiarsuit nunalinneranni umiarsualiviilluunniit avataanni kisarneranni aamma Kalaallit Nunaanni kisarfimmut tikinneranni umiarsualivimmiinnermut aamma umiarsuarni takornarianik angallassisuni ilaasut akileraarutit Nunatta Karsianut akiliisassapput, tak. §§ 1 a aamma 1 b.

§ 1 a. Umiarsuit tamarmik umiarsualivimmiinnermut akileraarutit akiliisassapput, taamaattoarli takuuk § 2.

§ 1 b. Umiarsuit takornariartaatit tamarmik § 1a, taamaattoq § 2 naapertorlugu umiarsualivimmiinnermut akileraarummut tapitut ilaasut tamarmik amerlassusaat malillugit nunalinerit tamaasa ataasiarlutik ilaasunut akitsuummut akiliisassapput. Ilaasunut akitsuut ilaasumut ataatsimut 50 kr.-nik annertussuseqarpoq.

Imm. 2. Ukiumut aningaasanut inatsiseqarfiusumut 2025-mut taassumalu kingorna umiarsuarnut takornariartaatinut ilaasunut akiliut aningaasanut inatsimmi oqaasertaliussakkut allanngortinneqarsinnaavoq.

§ 1 c. Umiarsuarni takornariartaatini ilaasut umiarsualivimmi umiarsualiviullu avataani, tassunga ilanngullugu sineriammi pinngortitamili nuunnginneranni, kommune avatangiisinut aserfallatsaaliuinnermullu umiarsuarni takornariartaatini ilaasumut ataatsimut annertunerpaamik 50 kr.-nik akiligassanik aalajangiinissamut piginnaatinneqarpoq. Akileraarut nunaligussinermi umiarsuup

takornariartaatip ilaasui tunngavigalugit, nunaligunneqartut amerlassusai apeqqutaatinngit, naatsorsorneqassaaq. Kommuni sumiiffiit attuumassutillit tamakku toqqassavai, aamma ukiup siuliani akileraartarnermut aqutsisoqarfimmut kingusinnerpaamik 1. oktobarimi nalunaarutigineqartussat akiligassat annertussusaat taakkununga atasut aalajangersassallugit.

§ 2. §§ 1 a aamma 1 b malillugu akileraaruteqartussaataitaanngillat aamma 1 c malillugu akiliutininik akiliisinneqartussaannngillat:

- 1) Angallatit aalisariutit Kalaallit Nunaanni angerlarsimaffeqartutut nalunaarsorneqarsimasut.
- 2) Angallatit aalisariutit Kalaallit Nunaanni aalisarnermik suliffeqarfimmit attartorneqartut.
- 3) Umiarsuit 200 bruttotonimit (BT) minnerusumik angissuseqartut Kalaallit Nunaanni angerlarsimaffeqartutut nalunaarsornikut.
- 4) Niuerfimmi atugaanngitsut sorsuutit danskinit nunanillu allanit pigineqartut, kiisalu danskit nunallu allat naalagaaffisa umiarsuaataat.
- 5) Umiarsuit Namminersornerullutik Oqartussat ingerlatsiviinit, Kalaallit Nunaanni kommunimit imaluunniit danskit naalagaaffianit pigineqartut attartorneqartulluunniit.
- 6) Umiarsuit aseruatersimasut usimik allagartaat malillugit umiarsualivimmut pineqartumut nunalittussaannngikkaluartut.
- 7) Umiarsuit taamaallaat pujorsiutiminnik aaqqiinialutik, nakorsamik atorfissaqartitsillutik, inuttatik taarsissallugit, imaluunniit napparsimasunik, toqusunik imaluunniit umiusimasunik imaluunniit imaani umiarsuarmut ikisaminnik imaluunniit ilisimasortamik niusiartorlutik umiarsualivimmut nunalinniartut.
- 8) Umiarsuit taamaallaat ilisimasassarsiornermut imaluunniit ikiuiniarnermut atorneqartartut.
- 9) Umiarsuit nunaqarfinnik isorliunerusunillu pilersuinermit aalajangersimasunik ingerlaarfeqartut.
- 10) Ilaasartaatit umiarsuaatileqatigiiffinnit Kalaallit Nunaanni Namminersorlutik Oqartussanut sullissinissamik isumaqatigiissuteqartunit pigineqartut.
- 11) Umiarsuit Kalaallit Nunaanni aalajangersimasumik inissinneqartut, taamaallaat umiarsuurtut annanniutitut, kalittaatitut, siorartaatitut, ujaqqanik qalluutitut, aqqartartut umiarsuaattut prammitulluunniit atorneqartut.
- 12) Umiarsuit Kalaallit Nunaanni nunami suliffissuarmi tunisassiornissaq siunertaralugu aalisakkanik imaluunniit aalisakkanit tunisassianik Danmarkimi, Savalimmiuni nunaniluunniit allani pisianik usingiartut.
- 13) Umiarsuit nunaqarfinni avinngarusimasunilu aalisakkanik aalisakkaniillu tunisassianik pisiortortut.
- 14) Umiarsuit taamaallaat uuliamik uuliamillu tunisassianik assartuisut.

Imm. 2. Umiarsuit umiarsualivimmut 1-imut arlalinniluunniit aalajangersimasumik angalasut § 1 b malillugu akileraaruteqartussaataitaanngillat aamma 1 c malillugu akiliutininik akiliisinneqartussaannngillat.

§ 3. Akileraarut akit uku malillugit bruttotonimut ataatsimut (BT-mut) naatsorsorneqassapput, taamaattorli minnerpaatut 70 BT-mut:

- 1) Umiarsuup bruttotonia 30.000 BT-nik qaangiisimassanngippat umiarsuit takornariartaatit ullup unnuallu aallartinnerinut ataasiakkaanut tamanut 1 kr. 10 øre. Umiarsuup BT-a 30.000-iuppat imaluunniit sinnersimassappagu akitsuut ullormut unnuamullu aallartittunut ataasiakkaanut tamanut tassaassaaq BT-kkaanut tamanut 2 kr. 20 øre, taamaattorli takuuk imm. 2.
- 2) Ilaasartaatit ullup unnuallu aallartinneranut 0 kr. 70 øre.

3) Aalisariutit Danmarkimi, Savalimmiuni nunaniluunniit allani angerlarsimaffeqartutut nalunaarsorneqarnikut ullup unnuallu aallartinneranut 0 kr. 70 øre.

4) miarsuit nassiussanik assartutit umiarsuillu allat sapaatip akunnerata aallartinneranut 0 kr. 70 øre.

Imm. 2. Umiarsuit takornariartaatit Nuummi umiarsualivimmut tikinneranni imm. 1, nr. 1-imi akileraarutini akigititat atorineqanngillat. Umiarsuaq takornariartaat 30.000 BT sinnerlugu oqimaassuseqanngippat akileraarut tassaassaaq 0 kr. Umiarsuup BT-a 30.000-iussappat imaluunniit qaangersimassappagu akileraarut ullormut unnuamullu aallartitanut ataasiakkaanut tamanut tassaassaaq BT-kkaanut 0 kr. 70 øre.

§ 4. § 1 a malillugu naatsorsuinermi tunngaviup naatsorsornerani BT kisitsisinut ilivitsunut qaninnernut ammut akunnaallisinneqassaaq.

§ 5. § 1 b malillugu akileraarutit akilernerqartussat umiarsuup tulanneranit ilaasut amerlassusaat pillugit paasissutissanik, umiarsualiviulluunniit avataani kisarneranit imaluunniit kisarfimmut tulanneranit tunngaveqartillugit aalajangerneqassapput. § 1 a malillugu akileraarutit akilernerqartussat aamma § 1 c malillugu akiliutit akilernerqartussat kingusinnerpaamik umiarsuup umiarsualivimmit imaluunniit kisarfimmit aallarnerani aalajangerneqassapput.

Imm. 2. Umiarsuup naalagaata, isumaqatiginninniartartuata, imaluunniit agentia kingusinnerpaamik umiarsualivimmit kisarfimmilluunniit aallarnermi akileraaruseriffiup atugassaatut, akuersisummik ilaqartillugit, akileraarutit akiligassallu akilernerqartussatut naatsorsorneqartut pillugit elektroniskinnorlugu immersugaq nassiutissavaa. Immersugassaq § 1 c naapertorlugu akiligassanut akilernerqartussanut atugassatut umiarsuup suussusaanik, umiarsuup tonnageanik bruttotonimik (BT-mik) nalunaarneqartunik, umiarsuarnut takornariartaatinut tunngatillugit umiarsualivimmi ullut unnuallu aallartittut piviusutut amerlassusivii, kiisalu sumiiffiit tikinneqartut amerlassusaannik ilaasullu angallammiittut amerlassusaannik immersugassaq paasissutissanik ilaneqassaaq.

Imm. 3. §§ 1 a aamma 1 b akileraarutit akilernerqartussat aamma § 1 c malillugu akiligassat akilernerqartussat umiarsuup umiarsualivimmit kisarfimmilluunniit aallarneranit akiligassanngussapput.

Imm. 4. Akileraarutit akiligassat, akiligassallu akilernerqartussat akiligassanngornikut umiarsualiveqarnermut oqartussanut ullut 14-it qaangiutsinnagit akilernerqassapput.

Imm. 5. Umiarsualiveqarnermut oqartussat qaammammi umiarsualivimmiinnermut aamma umiarsuarni takornarianik angallassisuni ilaasut akileraarutaannik akileeqqusissutinillu piffissaq eqqorlugu nalunaaruteqarfissaat akiliiffissaallu kingulleq tassaavoq qaammatip tulluittup ulluisa 15-iat.

Imm. 6. Umiarsuit umiarsualivimmut 1-imut arlalinnuunniit aalajangersimasumik angalasartut § 1 a malillugu umiarsualimmiinnermut akileraarut pillugu Imm. 3 aamma 4-mi aalajangersagaasunit allaanerusumik akilersueriaaseqarnissamik akileraaruseriffimmut isumaqatigiissusiorsinnaapput. Umiarsuit umiarsualivimmut 1-imut arlalinnuunniit aalajangersimasumik angalasartut 1b malillugu akileraartussaataaannngillat aamma 1c, malillugu akitsuutininik akiliissanngillat, tak. § 2, imm. 2.

Imm. 7. Ukiumi pisartut naammassereernerisa kingorna akileraaruseriffiup avatangiisinut aserfallatsaaliuinemullu akiliutinit isertitat, takuuk § 1 c, kommuninut ukiumut ataasiarluni naatsorsoriarlugit akilertassavai.

§ 6. Akileraarutit akiligassat, akiligassallu akilernerqartussat umiarsuup akiligassai naatsorsorneqarsinnaanngippata akileraaruseriffiup akileraarutit akiligassat, akiligassallu akilernerqartussat missingiillutik annertussusilersinnaavaat.

§ 7. (atorunnaarpoq).

§ 8. (atorunnaarpoq).

§ 9. (atorunnaarpoq).

§ 10. Inatsisartut inatsisaat manna malillugu akileraarutitut akiligassanik, akitsuutit akileeqqusissutit, aamma akiliissutissanngortitat akilernissaannut assigiittut pineqarlutik umiarsuaatilik, piginnittoq, attartuisoq aamma pisortaasoq akiliisussaapput. Akiliisoqannginnerani akileeqqusissutit kingornatigut taassuminnga akiliisitsiniarnissaa siunertaralugu akileraartarnermut allattoqarfimmut tamatuma nalunaarutiginnissaannut umiarsualiveqarfimmi oqartussaasoqarfik pisussaaffeqarpoq.

§ 11. Naalakkersuisut akiligassat kinguaattoorutit akilernerqanngippata, akileraarutit, akiligassat pillaaammillu akiligassiissutit suliamillu suliarinninnermut aningaasartuutit akilernerqarnissaasa imaluunniit akiligassat qularnaveeqqusernissaasa tungaanut umiarsuit Kalaallit Nunaanni umiarsualivinnut tulannissaat itigartissinnaavaat.

§ 12. Naalakkersuisut Inatsisartut inatsisaata matuma atuutilersinnissaannut uku pillugit malittarisassiorsinnaapput.

Imm. 2. Umiarsualiveqarnermut qitiusumik oqartussat suliffeqarfiit Inatsisartut inatsisaanni akileraarutit ilaasut Nunatta Karsianut kommuninullu akiligassat akilernerqartussat akilersinniarnissaannut taakkulu akileraaruserfimmud akilernerqarnissaannut peqqusinissaannik piginnaatitsinissamillu piginnaatissinnaavai.

Imm. 3. Naalakkersuisut najukkami umiarsualiveqarnermut oqartussaataasutut toqqarneqartut qaammatisiutit malillugit ukiut naanerisa kingorna tamaasa ukiumoortumik nalunaaruteqartarnissaannut piumasaqaatinik aalajangersaasinnaapput. Nalunaarutit suliarineqarneranut aningaasartuutaasinnaasut najukkani, umiarsualiveqarnermut oqartussat toqqarneqartup akilissavaat.

Imm. 4. Naalakkersuisut kommunit avatangiisinut aserfallatsaaliornermullu akiliummit isertitat atuinnissaannut aamma naatsorsuusiornerrannut malittarisassanik aalajangersaasinnaapput. Akiliutip kommunit najugaqarfigisami nunallu immikkoortuani takornariartitsinnermut periarfissanik ineriartortitsineq siunertaraa.

§ 13. Inatsisartut inatsisaata atuutinnissaannut Naalakkersuisut maleruagassiorsinnaapput aammalu umiarsuit ilaasa akileraarutit akiliinnginnissaannik oqilisaaffiqarneqarnissaannilluunniit aalajangersagaliorsinnaallutik.

§ 14. Kinaluunniit piaaraluni mianersuaalliorujussuarlunuunniit makku pillugit akiliisinnerqarsinnaavoq:

1) akitsuutit akiligassallu akilernerqartussat naatsorsorneqarnissaannut taakkualu nakkutigineqarnissaannut atugassanik eqqunngitsumik paasinerlunneqarsinnaasumilluunniit paasissutissiisoq imaluunniit paasissutissanik nipangiussiinnartoq, imaluunniit
2) pineqartumut akileraarutitut tunngavigisanik, akiligassanillu akileeqqusissutitik missingersuutigisatut inissiinerit nalunaarutiginerisa kingornatigut kingusinnerpaamik sapaatip akunneri sisamat qaangiutinnginneranni akileraarutitut akiliutissat, akiligassanillu akileeqqusinernik inissiinerit appasippallaarneri pillugit akileraaruseriffimmut nalunaaruteqanngitsoq.

Imm. 2. Kialuunniit, Inatsisartut inatsisaat manna naapertorlugu maleruagassiani aalajangersakkanik piaaraluneerluni mianersuaalliorujussuarlunuunniit unioqqutitsisup akiliisinneqarnissaa pillugu aalajangersagaliortoqarsinnaavoq.

Imm. 3. Aktieselskabet, anpartsselskabet/ andelselskabet, piginneqatigiillutik umiarsuaatileqatigiit assigisaalluunniit unioqqutitsippata piginneqatigiiffik akiliisinneqarnissamut akisussaatinneqarsinnaavoq.

§ 15. Naalakkersuisut imaluunniit Naalakkersuisut tamatumunnga piginnaatitaata Inatsisartut inatsisaanni matumani aalajangersakkanik unioqqutitsisoq nalunaarfigisinnaavaat suliassap eqqartuussinertaqanngitsumik naammassineqarsinnaaneranik, unioqqutitsisup unioqqutitsinini nassuerutigippagu akiliisitsissullu nalunaarummi taaneqartoq piffissaq aalajangersimasoq, qinnuteqarnikkullu sivitsorneqarsinnaasoq, nallertinnagu akilerumallugu akuersippat.

Imm. 2. Nalunaarummut imm. 1-imi taaneqartumut tunngatillugu aalajangersakkat Kalaallit Nunaanni eqqartuussisarnermi inatsimmi kapitali 5-imi, unnerluussinermik imaqtut aammattaaq atuupput.

Imm. 3. Akiliisitsissut piffissaq eqqorlugu akilernerqarpat imaluunniit aalajangiunneqarnermi kingorna akiliisitsiniarnikkut akilersinneqarpat qanoq iliuuseqaqqittoqas sanngilaq.

Imm. 4. Pillaammik akiliisitsissut landskarsimut nakkartinneqassaaq.

§ 16. Inatsisartut inatsisaat ullormi 1. januar 1993-imi atuutilissaaq.

Inatsisartut inatsisaat nr. 4, 13. maj 1993-imeersoq^[i] atuutilernissamut ima aalajangersagaqarpoq:

§ 2

Inatsisartut inatsisaat una atortuulissaaq aprilip aallaqqaataani 1993-imi.

Inatsisartut inatsisaat nr. 14, 28. oktober 1993-imeersoq^[ii] atuutilernissamut ima aalajangersagaqarpoq:

§ 2

Inatsisartut inatsisaat 1. juli 1994-imi atuutilissaaq.

Inatsisartut inatsisaat nr. 11, 13. juni 1994-imeersoq^[iii] atuutilernissamut ima aalajangersagaqarpoq:

§ 2

Inatsisartut inatsisaat 1. juli 1994-imi atuutilissaaq.

Imm. 2. § 1, nr. 1-imi aalajangersagaq ullormiit 1. januar 1994-imiit atuutilerpoq.

Inatsisartut inatsisaat nr. 17, 3. november 1994-imeersoq^[iv] atuutilernissamut ima aalajangersagaqarpoq:

§ 2

Inatsit manna atortuulersinneqarpoq 1. januar 1995 aallarnerfigalugu.

Inatsisartut inatsisaat nr. 1, 20 maj 1998-imeersoq^[v] atuutilernissamut ima aalajangersagaqarpoq:

§ 2

Inatsisartut inatsisaat manna 1. juli 1998 aallarnerfigalugu atortuulissaaq.

Umiarsualivimmiinnermut akileraarutit pillugit Inatsisartut inatsisaata allanngortinneqarneranik Inatsisartut inatsisaat (Umiarsuit takornarianik angallassissutit ilaasunik angallassinermi akitsuummik akiliisinneqartalernissaat) nr. 2, 21. maj 2002-meersoq^[vi] atuutilernissamut ima aalajangersagaqarpoq:

§ 2

Inatsisartut inatsisaat manna 1. juli 1998 aallarnerfigalugu atortuulissaaq.

Umiarsualivimmiinnermut aamma umiarsuit takornarianik angallassissutit ilaasunik angallassinerannut akileraarutit pillugit Inatsisartut inatsisaata allanngortinneqarneranik Inatsisartut inatsisaat (Umiarsuit takornarianik angallassissutit ilaasunik angallassinerannut akileraarummik qaffaaneq kiisalu angalanerit ataatsimut aaqqissuuteriikkat akileraarutaat) nr. 3, 27. marts 2006-imeersoq^[vii] atuutilernissamut ima aalajangersagaqarpoq:

§ 2

Inatsisartut inatsisaat atuutilissaaq ulloq 1. april 2006-imiit.

Inatsisartut akitsuutit il.il. pillugit inatsisaasa ilaasa allanngortinnerat pillugu inatsisartut inatsisaat (Akileraaruserinerup qitiusumiit ingerlanneqalernerata kinguneranik allannguutit aamma nakkutilliinnermut maleruagassat erseqqissaateqarfigineri) nr. 14, 2. november 2006-imeersq^[viii] atuutilernissamut ima aalajangersagaqarpoq:

§ 11

Inatsisartut inatsisaat 1. januar 2007-imi atortuulissaaq.

Umiarsualivimmiinnermut aamma umiarsuarni takornarianik angallassisuni ilaasut akileraarutaat pillugit inatsisartut inatsisaata allanngortinneranik inatsisartut inatsisaat (Akileraarutip qaffannera) nr. 8, 5. december 2008-meersq^[ix] atuutilernissamut ima aalajangersagaqarpoq:

§ 2

Inatsisartut inatsisaat 1. januar 2009-miit atortuulerpoq.

Umiarsualivimmiinnermut aamma umiarsuarni takornarianik angallassisuni ilaasut akileraarutaat pillugit inatsisartut inatsisaata allanngortinneqarneranik Inatsisartut inatsisaat (Umiarsuarni takornarianik angallassisuni ilaasut akileraarutaannik aamma ilaasunik nalinginnaasunik takornarianillu angallassinermi ilaasut akileraarutaannik atorunnaarsitsineq) nr. 14, 3. juni 2015-imeersq^[x] atuutilernissamut ima aalajangersagaqarpoq:

§ 2

Inatsisartut inatsisaat 1. juni 2015-imi atuutilissaaq.

Umiarsualivimmiinnermut akileraarutit pillugit Inatsisartut inatsisaata allanngortinnera pillugu Inatsisartut inatsisaat (Umiarsuarni takornarianik angallassisuni ilaasut akileraarutaannik atuutilersitseqqinneq) nr. 61, 20. november 2023-meersq^[xi] atuutilernissamut ima aalajangersagaqarpoq:

§ 2

Inatsisartut inatsisaat ulloq 1. december 2023 atuutilissaaq.

Aningaasaqarnermut Akileraartarnermullu Naalakkersuisoqarfik ulloq 22. april 2024

Nikolai S. Christensen (atsior.)
Naalakkersuisoqarfimmi pisortaq

/ Morten W. Selvejer (atsior.)

- [i] Inatsimmik allannguneq § 3, imm. 1, nr. 3 aamma imm. 2-mut tunngavoq.
- [ii] Inatsimmik allannguneq § 2, nr. 5 aamma 7-imut aamma § 3, imm. 1, nr. 3, aamma § 3, imm. 2-mut tunngavoq.
- [iii] Inatsimmik allannguneq § 3, imm. 1, nr. 3-mut aamma § 15, imm. 4-mut tunngavoq.
- [iv] Inatsimmik allannguneq § 3, imm. 1, nr. 3-mut tunngavoq.
- [v] Inatsimmik allannguneq § 3-mut tunngavoq.
- [vi] Inatsimmik allannguneq qulequttamut, §§ 1-imut aamma 2-mut kiisalu § 5-imut tunngavoq.
- [vii] Inatsimmik allannguneq §§ 1, imm. 2-mut aamma § 5, imm. 4-mut tunngavoq.
- [viii] Inatsimmik allannguneq §§ 1-imut, 5-imut, 6-imut, 7-imut, 8-mut, 9-mut, 13-imut kiisalu 14-imut tunngavoq.
- [ix] Inatsimmik allannguneq § 1, imm. 2 aamma 3-mut tunngavoq.
- [x] Inatsimmik allannguneq qulequttamut, §§ 1, imm 2 aamma 3-mut, § 3, imm. 1, nr. 1-imut kiisalu § 5, imm. 1 aamma 4-mut tunngavoq.
- [xi] Inatsimmik allannguneq qulequttamut, § 1, imm. 1-imut, §§ 1 a-mut, 1 b-mut, 1 c-mut, 2-mut, § 3, imm. 1 aamma 2-mut, §§ 4-mut, 5-imut, 6-imut, 10-mut, 11-mut, 12-imut kiisalu § 14, imm. 1 aamma imm. 2-mut tunngavoq.

Namminersorlutik Oqartussat
Imaneq 4
3900 Nuuk
E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut